



Aqqalu C. Jerimiassen

UPA 2022/17\_1

Atassut

21. Marts 2022

**Uunga siunnersuut: Akiliisarfik Ilangaassivik pillugu Inatsisartut inatsisaata atorunnaarsinneqarnera pillugu Inatsisartut inatsisaat.**

(Aningaasaqarnermut, Aatsitassanut, Inatsisit Atuutsinneranut Naligiissitaanermullu Naalakkersuisoq)

Qulequtaq qilanaarisimasarput maanna Atassummiit takkuppoq. Oqarsinnaavugullu, massuma qulequttap qaqqinneqarnera nuannaarutingalugu. Ukiuni kingullerni annertungaatsiartumik qitiusumut eqiterussineq ingerlanneqarsimavoq, ilaatigullu ilangaassiviup atuutilernissaanutaaq Atassummiit ernummatigisimavarput, sulii annerusumik qitiusumiit aqutsinerup nukittorsarneqarnissaa.

Sooq akkerlerisimavarput, naak innutaasut akiitsui qaffariartortutut taaneqartuarteraluartut?

Peqqutaa ataaseq annertooq taasinnaasarput uteqqitassara tassaavoq, qitiusumut eqiterussineq. Akileraartarnikkummi akiliisitsiniartarnikkullu ukiorpaaluit matuma siorna qitiusumut nussuinerup kingorna inunnut qanimut sullissineq sumiiffippaalussuarni atorunnaarsimavoq. Ingasammik akiliisitsiniartarneq eqqarsaatigissangaanni, illoqarfinnut aaliangersimasuinnarnut eqiterussereernerup kingorna innuttaasut akiitsui qaffassimaqaat.

Tamannalumi tupinnartuliaaangilaq, sumiluunniimmi qanimut kiffartuussineq appariaateqarpat naatsorsuutigisussaassuarputtaa illuanit allamik malitseqarumaartoq.

Atassumiit oqariartuutigiuartarparput qitiusumiit aqutsineq allaffissornerlu minnerpaaffianiittariaqartoq, inuiallu qanimut sullinneqarnerat katanngisaannassasoq. Innuttaasup kiilluunniit naammanginartumik sullinneqarneq, paasisinnaasaminillu qanimut ikiorneqarneq kiffartuunneqarnerlu iluarinerujuartussaammagit. Tupinnangitsumillu eqiterussuinerup malittaani, akiliisitsiniartarnikkut sulisuusut sumiiffinnut ataasiakkaanginnarnut inissiortorneqarnerisa malittaannit malinnaaniarneq ajornarnipilussuanngorpoq. Oqarluaannaraannilu annernaraluarpalluunniit, aningaasarsiornikkut qernertuliorsinnaaneq, akileraanginnissamullu putusiorsinnaaneq ammaaneqarsimalluni.

Akiitsunittoortanerluttaaq tassani innuttaasorpasuarputtaaq eqquinerliorpoq, ilaatigut eqiterussisimanerup kinguneranit, nammineerluni nalunaarsuiffissat naammanginartumik tamatigut naammassineqartarsimangillat ilarpasuinit, akileraarutitigut tapertanerit qaffaseqalutik,

naqqiusiortitsinissamut ikiorneqarnissamut naammanginartumik qanimut saaffiginniffissaqannginneq peqqutingalugu. Taamaalillunilu isertitariumaagassatut naatsorsuutit missigerneqamisaaernerinnaatigut (skøn) isertitarisimanngilluinnakkat malittaamik ukiumut akileraarfiusimasumut akiitsoqalertitaariataarnerit piulertarlutik. Tamannalu nukippassuarnik innutaasumut atuiffiusariaqalersarpoq, ilaatigut allaat tunniutiinnarnermik isertitarisimanngisaraluanik akiliisariaqalernerimik kinguneqaannartariaqalersumik.

Taamaattumunguna akiliisitsiniartarnikkut sulisoqarnermi nutaamik eqqarsartariaqalersugut, kommunit tassani suleqatiginerunissai avaqqunneqarsinnaanngilaq. Kommunimmi tassaammata ulluinnarni innutaasunut qaninnerpaamik sullissisuusut, taakkulu tassaajuarmata innuttaasut ulluinnarni saaffigissallugit qaninnerpaasamittutaaq isigiugaat. Takuneqartareerpormi maanna, naak kommunit allaffiini sulisuusut suliassaqarfimmik avataaniilereersimangaluartoq, akileraartarnikkut nammineerluni immersugassat tunniussuunneqarnerisa nalaanni pisussaaffitsik sinnerlugu ikiuutiinnartariaqartartut, sumiffigisaminni innutaasut qanimut akileraaruseriffimmik akiliisitsiarniartarnikkulluunniit sullissisunik sulisoqannginnera peqqutingalugu.

Atassummiit naalackersuisut taperserpagut, nutaamik periuseqartariaqarnermik siunnerfeqarlutik oqariartornerannut, isumalluarlulalu suleqataajumaarluta. Qitiusumummi eqiterussiarsimanerungaluaq iluatsinngitsoq takuneqareermat, neriuppugut tamakku ilinniarfigalugit nutaamik alloriaqqinnissaq isumaqatigiiffiusumik suleqatigiiffiulluarumaartoq.

Taamatut oqaaseqarluta Atassummiit siunnersuut Aningaasaqarnermut Akileraartarnermullu ataatsimiitsitaliamut innersuupparput.